

Prome Alto Comisario Roland Peterson a fayece



Un polis cu curason di mucha

Roland Wilbert Peterson a bay sosega

ORANJESTAD – Ayera e prome korpschef di nos cuerpo policial (KPA), Roland Wilbert Peterson a fayece. Pa varios aña sr. Peterson tabata un colaborador di Bon Dia Aruba, unda el a yega di publica un cantidad di su cuentanan y poesianan.

Na aña 1962 el a cuminsa cu carera exitoso como polis. E tempo aya como miembro di e cuerpo policial di Antias na Corsou. Na aña 1980, el a wordo transferi como Inspector di Polis na Aruba. Na 1986 ora cu Aruba a logra su Status Aparte, sr. Peterson a bira e prome comisario di KPA, caminda el a duna base y estructura na e instituto aki. Na 1989 el a wordo promoví como director di DOOV (Directorate of Public Order and Security), unda el a duna un gran aporte a base di su experticio. Durante su trayectoria, sr.



Peterson a participa den diferente curso di capacitacion na nivel di maneho. Tambe el a bay representa nos pais den diferente evento internacional relaciona cu polis. El a gradua den Academia Nacional di FBI y tambe el a yega di ocupa un funcion importante como hefe di Interpol na Aruba. Unda bes cu el a baha cu pensioen y el a warda su uniform



di polis den cashi, sr. Peterson a drenta den un faceta nobo como autor di buki di mucha, mostrando un gran sensibilidad pa nos muchanan y un amor pa nos idioma Papiamentu. Na aña 2003 el a presenta su prome buki di cuenta, esta 'Nos Fabula'. Sr. Peterson a nace 76 aña pasa na San Nicolas y semper el a percura pa e districto aki

por haya su desaroyo y reconocimiento, specialmente ora cu el a fungi como presidente di San Nicolas Business Association. P'esey algun habitante di e districto aki tabata yame cariñosamente como 'Mr. San Nicolas'. E dia cu sr. Peterson a presenta su prome buki, el a transporta su mes ora cu e tabata un mucha. "Pa un mu-

cha cu a lanta na San Nicolas y a come maripampunnan cu tabata crece contra e cura di Lago, e ta un honor". E acontecimiento aki a tuma luga pa prome biaha na Biblioteca Nacional su sede na San Nicolas... kiermen su San Nicolas stima.

E tabata un autor di buki y escritor hopi productivo. E mesun aña 2003 a publica otro buki 'Priki Priki y Princes'. E tabata e mesun aña cu Papiamentu a bira idioma oficial pa medio di un ley aproba den parlamento. Sr. Peterson a duna un gran aporte skirbiendo su obranan na Papiamentu pa e muchanan siña stima su propio idioma y literatura.

Sr. Peterson ta laga un gran bashi cerca su famianan y amigonan cu tabatin un gran aprecio y stimacion pe. Pero tambe su partida ta un perdida grandi pa nos literatura y pa nos dushi Papiamentu cu awe ta di luto.